

陳軒宇訂

霍亂論

卷尾附諸方

霍亂論

光緒乙酉八月吉日冠悔
堂主人募捐重刊板藏福
州城內總督後街羣玉齋

重刊霍亂論序

霍亂古無專書醫方亦略武林王孟英此刻爲救時金
鍼今夏泉郡醫局旣重刊之活人甚眾予聞而喜之莊
養齋同官郵贈一帙亟邀同人捐貲再刻於省垣比歲
此證頗夥一則盛暑多雨伏陰可慮貪涼者覓地延爽
以快一時星星之火隱藏不見逮至燎原救已弗及此
不慎於天時也街市積穢河淤溝塞猶人之脈絡不通
此失治於地利也百病由寒而起當盛夏房事宜斷爲
第一要著下元能固則寒氣無從以中至多服涼劑及

生冷食物謂可卻暑皆能種毒彼農夫暴背負販赧肩
汗浹如雨飲水雖多有以發之非此鮮不積滯生病此
自誤於人事也然不外節嗜欲慎飲食六字良箴耳世
苟究心於天地人三者霍亂自平安有是事顧方證不
可不知備以救人卽體天地好生之德在人妙於運用
焉

光緒乙酉八月旣望溫陵楊 浚雪滄識於榕垣三千
年吉樂之樓

家兄柳吟善譚醫而極折服於武林王君孟英丁酉冬
予始得而見之果奇人也遂相莫逆嘗語予曰天以五
運六氣化生萬類而人或因此以致疾者是天地之氣
亦有時而偏也故神農氏播穀之餘卽嘗藥性有熊氏
垂裳之際特著方書雖曰開物成務之事實寓補偏救
弊之心輔相兩間原非小道能紹其統者唯漢季張仲
景一人而已所著傷寒金匱二書集諸氏之大成爲萬
世之模楷俾後賢得以各抽其緒而尙論之如河間論
三焦戴人論三法明之論升陽丹溪論滋陰喻氏論秋

燥吳氏論瘟疫張鳳達論暑郭右陶論痧皆具有卓識
而自成一家者也予聞而竢之今孟英復出所述霍亂
論示予蓋因年來是證流行而治無善法乃特據其蘊
藉經綸之學發爲補偏救弊之言引古證今述而不作
辨訛別異義已無餘功駕前賢志希古聖此日之道行
千里將來之名數一家皆於孟英無慙焉爰述其言以
爲序

道光十八年戊戌閏四月浙江溫台玉環餉捕同知前
翰林院庶吉士愚弟海豐張洵拜書

武林王孟英先生抱倜儻之才精軒岐之學年未冠遊長山卽以良醫聞迄今十餘年來車轍千里計指下所生全蓋不知若干人矣然視疾之外足不輕出戶手未嘗釋卷此其好學深思誠有人所不能及者故能洞徹病情而投劑多效也如近行時疫俗有稱爲吊腳痧一證古書未載舉世謂爲奇病紛紛影射天札實多賴先生大聲疾呼曰此卽霍亂轉筋之候也嗚呼先生其先覺者乎一言喝破堪回大地之春乃猶慮沈迷者之未盡覺也慨然作霍亂論一書鑄古鎔今闡經斥異其有

功於世人所共知矣至先生之爲人尤世之罕覯恂恂然不趨乎時不戾乎時望之可畏卽之可親凡從而遊者皆欽愛不忍離今予得與合併甫數月而先生遽爾言歸再圖把臂其在何時悵然久之因索其將鋟之藁一讀而敘此數言以誌送別之依依卽世之得讀是書者亦可因此而想見其爲人

道光十有八年夏五月澱水諸葛令竹泉氏題於環山之挹翠軒

自序

霍亂急證也霍亂而轉筋則證之尤急者也然內經發其論先哲著其方矣奈往往有惑於弔腳痧之名而駭爲奇特之病目眩心疑妄施治療抑何陋哉夫弔腳痧俗稱也以其上吐下利之後筋轉於腓而動掣與呼乾霍亂爲絞腸痧同其比喻耳有指鹿爲馬而好爲大言以欺人者開口傷寒論動手四逆湯鹵莽滅裂似是而非更可歎矣若傷寒論乃金科玉律之書不得草草讀過者觀其論霍亂首以熱多寒多分治是霍亂原有陰


陽之殊也但五苓散外何竟無一言以及熱證之治豈
聖人垂訓亦爾偏疎蓋由書傳兵火之餘難免遺亡之
憾因此識彼在學者之自得焉矧四逆湯條於既吐且
利之下緊接曰小便復利重申曰下利清穀是何如其
可嘔而瞻顧耶苟不識此而徑敢妄援其例以誤人者
不得藉口聖人而自卸其罪也且是證也每發於夏秋
之間甚則流行似疫闔境皆然謂非暑溼熱三氣之所
釀抑何至於此極乎其間亦有陰寒之證者皆是安逸
之人有自取之道不可因此而概彼也故

雄

謂霍亂之

屬熱者生病之常也眾之所同也霍亂之屬寒者他氣
之逆也人之所獨也憫世人之惑於俗誣於古而未明
夫常變之道也因述其大略參以管窺而質之大方云
爾

道光戊戌春三月上浣武林王士雄孟英書於天台道
中



霍亂論例言

一是書以內經傷寒論爲宗旨義有未備者采守眞鳳達等書以補之至一切偏談激論概不泛引以滋眩惑

一弔腳痧卽霍亂之劇而轉筋者原非另有一證也然初立此名不過因其病狀而呼之孰知流行旣盛互相傳訛遂失其本來之眞而以爲奇異之病夫好立名目惑人聽聞他事且不可況醫道有關性命哉伊誰生此厲階天枉不可勝數今取素靈

傷寒金匱之文而發明之采昔賢論說治案以辨證之名曰霍亂論蓋欲世人之豁然心目也

一乾霍亂俗呼絞腸痧由來久矣第古書皆無專條茲采郭氏論及張氏說以廣之然古人未聞有惑於絞腸痧之名而失乾霍亂之治者奈今人一聞用腳之說遂茫然無措而不知其卽是轉筋霍亂何古今人相去之太遠耶可嘸也已

一采古案所以明其治之有據也綴以拙註所以廣其案之有法也附錄俚案所以實其法之有徵也

或有未善就正宗工

一霍亂雖非小證然偶合古法竟可不藥如飲水單
方刮刺之類皆是集中備載不遺庶僻壤征途咸
得按書救療及其藥也允非粗工可辦故所列古
方特不註分卽來復丹等暨善後諸方並略而不
錄冀醫者求其奧而悟其微未可執一定之成方
以應無窮之活病也

